



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8



Jaishankar-i South Korea Foreign Minister den senden amen

Kompany-i aniba Burnley team Premier League-i iogo



VOL. XX NO. 176 (ADOK 176) DIMAPUR AMUNGNÜ (SUNDAY)

RONGCHII (APRIL) 09, 2023

₹ 5.00

India tesem balala nung Good Friday among Tir Droupadi Murmu-i fighter jet nung mener senzü

New Delhi, April 8, 2023 (Agencies): India kübok tesem aika nung Khristan tamangertemi Good Friday kanga metsünga reta mongogo.

India Tatong Tir Jagdeep Dhankhar-i nübortem dang Khristai sayuba aria bilemba, taochi aser tatok agütsüba lenmang nung jajatsü ayongzük.

"Good Friday ajanga Kibur Khrista-i meimchir asoshi Pa taküm bendanga agütsüba asenoki bilemteter. Iba anogo nung asenoki Khristai sayuba lenmang nung jajatsü bangzüngdi" ta Dhankhar-i ashi.

"Tanü Good Friday nung Kibur Khristai bendanga agütsüba bilemteter. Pai timtem aser tokrong arem saka tenzükbä aser aria bilemba tangatetba nungi mepila. Kibur Khrista tangatetbatem ajanga maneni nübortem ajungmesoang" ta Prime Minister Narendra Modi-ia metetdaksü.

Delhi, Punjab, Karnataka, Maharashtra, Tamil Nadu, Uttar Pradesh, Madhya Pradesh, Telangana aser Bihar dena state balala nung Good Friday kanga longsotepa mongogo.

Külen, Khristantem teimba ser aliba Mizoram aser Nagaland nung tekülem sentepem ayonga agi aser tamangertemi süng agi yangluba kangki bener yimdong sema senzü.

Mizoram nung Khristan tamanger telemsa ajaki special services ayonga agi aser "Zaikhawm mesüra Lengkhawm"

ken aten.

Mizoram state sorkari Good Friday ya public holiday ta sangoktsüba ajanga sorkar office, shisaliok reju, bank aser nija office ajak shibanga liasü.

Nagaland yimtiba Kohima nunga tamangertemi Old MLA Hostel junction nungi St Francis de Sales Parish tashi kangki ka bener yimdong sema jaja. State kübok tesem balala nung Khristan tamangertemisa tenla kidang sentong balala ayongzükä agi.

"Yisu Khrista asüba ajanga meimchirtem temenen nungi alangzük" ta Nagaland Governor La. Ganesan-i Good Friday sangdong nung metetdaksü.

"Yisu Khrista-i taküm bendanga agütsüba aser Pai asenok tatemzükbä kecha melii meimba bilemteter. Nisung ajak temoatsü aser tetezü aketba Good Friday ka amongtsü moatsür" ta Nagaland Chief Minister Neiphiu Rio-i metetdaksü.

Maneni, Kohima Baptist Pastors' Fellowship (KBPF)-i Yisu Khrista shia aruba benjungtsü atema Deobarnep Naga Solidarity Park, Kohima nung Easter Sunrise Service agitsü sentong lir.

Hokolbarnü Kerala nung tamanger aikati Ernakulam district nung aliba Malayattoor hills-i kangki apur atu.

AD52 nung Apostle St Thomas-i iba tenem sendang ta amanger aser iba tenem kolak nung St Thomas church lir.



Tezpur air base nung India Tir Droupadi Murmu-i Sukhoi-30 MKI tayimtsü nung mamendang agiba noksa ka angur.

Tezpur, April 8, 2023 (Agencies): India Tir Droupadi Murmu-i Assam kübok Tezpur air base nungi fighter aircraft ka nung mener yimogo.

Indian Air Force base nungi Group Captain Naveen Kumar Tiwari-i Tir Murmu Sukhoi-30 MKI tayimtsü nung mener apusoa anir ao.

Tir Murmu-i anogo asemnü atema Assam sendangi arua lir aser tanep Guwahati nungi Tezpur-i aru.

Tanü ghonda tesadang ka shi la tayimtsü nung mener senzüba sülen "kanga tajung liasü" ta Tir Murmu-i osangbener dang ashi.

Tezpur air base nung Air Marshal S P Dharkar, Governor Gulab Chand Kataria aser Chief

Minister Himanta Biswa Sarma nungeri la pelaa agizük.

APJ Abdul Kalam aser Pratibha Patil sülen fighter aircraft ka nung amenba Tir tasembubaji Murmu lir. Taoba Tir ana Kalama ser Patil nati Pune air base nung amen.

Hokolbarnü Tir Murmu-i Kaziranga National Park and Tiger Reserve (KNPTR) nung Gaj Utsav benjungmong nung shilem agi.

Project Elephant tenzüker küm 30 abensaba tenüng nung iba benjung among.

"Shiti ya asen putiotsü, tamangba yimsü aser sobaliba nung tongtipang shilem ka lir. Project Elephant takok angutsü atema sendaka alir ajak longjemer inyaktüsü. Talisa school tanurtem

dang shiti indang osang tejangja metetdaksütsü tim" ta Tir Murmu-i ashi.

Laisa shiti aser meimchir tsüngda tesentaktep tajung lia aruba ashidang Oscar Award winning documentary The Elephant Whisperers indang olen ka metetdaksü.

Iba sentong nung Assam governor Gulab Chand Kataria, chief minister Himanta Biswa Sarma, Union forest, environment and climate change minister Bhupendra Yadav aser tangar aika aden.

"Project Elephant ya 1992 küm tenzüker aser iba ya shiti yongstük teimba kümdaksütsü nükjidong nung tenzükbä liasü. Küm 30 tsüngda onoki linük nung elephant reserves 33 tashi lapoktetogo" ta Union minister Bhupendra Yadav-i ashi.

Hokolbarnep Tir Droupadi Murmu-i Kaziranga National Park indang central range nung jeep safari ka nung senzüba liasü.

Lai Mihimukh Point nungi KNP telungi ai aser shirurutem rebranga senzü.

Tir Murmu-isa Hokolbarnü Guwahati nung 'Mount Kanchenjunga Expedition-2023' sentong tenzüksü aser Gauhati High Court indang platinum jubilee nung aden.

Moa Sübongi Padma Shri Award agizük



Moa Sübong-i India Tir Watsü Droupadi Murmu ket nungi Padma Shri Award agizükba noksa angur.

Dimapur, April 08 (TYO): Naga nung sioshi agir, Naga nung kensü nung parnoki yangluba kongki 'Bamhum' apua tetezü aketba tanganütsü ken mejema atener telok 'Abiogenesis' tentetsang Moa Sübong sempet aser mapa balaka junga rebrangteta pa nem India government-i Padma Shri Award konang agütsüogo.

Padma Shri Award ya India nung Civilian Award tematiba rongnung pezübuba lir. Iba konang ya 'Art category' nung agütsür.

Parnoki atenba kentem dang ya 'Howey' ta ajar. Ibaji asenok Naga nung kensü nung Ho-hi ho-we ta meyua adokba nungi agizükä jatet pa pai yakanü Delhi nungi iba konang agizükä bener aruba mapang tayimtsü anendak osangbenertem den jembidang metetdakja liasü.

Iba Padma Shri konang agütsüba sentong nung yakanü Delhi nung India tir alidak, tir Watsü Droupadi Murmu-i pa nem agüja liasü. Iba sempet agizükba sentong nung pa kinungtsü Wt. Arenla Moa dena liasü. Wt. Arenla yaa pa kinungbo den kasa telok nung nüngtugu kentener ka lir.

Pa iba konang agizükä bener aruba mapang pa nem tenüngsang agütsütsü asoshi Dimapur tayimtsü anendak Dimapur Mongsenyimti Senso Telongjem den Dimapur Watsü Telongjem aser Dimapur Ao Lanur Telongjem nungi lenirtem liasü.

"Iba konang anguba ya meimlaba sempet ka lir, iba Tsüngrem temoatsü aser nübortemi yariba ajanga angu, anungji parnok ajak dang pelar," ta Padma Shri Moa Sübongi metetdaksü.

Dimapur Zone Ao Officers' Telongjem tentetogo

Dimapur, April 08 (TYO) : Kohima aser Mokochung nung tentetba sülen April 08, 2023 anogo nung Dimapur nunga Dimapur Zone Ao Officers' Telongjem (DZAOT) tentetogo.

Iba tentet nung center aser state government kübok ministry aser department balala nung Dimapur, Niuland, Chumoukdima aser Peren district nung inyakertem aser ano tanga tesem nung inyaker süaka Dimapur, Niuland aser Choumukedima nung telidak (permanent residents) Aor officertem ajak züngsem asütsüsa DZAOT temzüng nung latetogo.

Tanü yangi Hotel Saramati nung iba sentong agiba mapang tajungshi o jembidang, "asenok Aor officertem aser legislator-tem na tsüngda tesendaktep tajung lia telongjem nung nübortem asoshi shisalemsatepa inyaka aotsü nüngdaker," ta Additional Chief Secretary, Nagaland Wb. Sentiyanger Imchen metetdaksü.

Dimapur nung Aor officertem



Wb. Sentiyanger Imchen, Additional Chief Secretary.

telongjem tentetba asoshi tenüngsang agüja jembidang, "iba telongjem ya Aortem asoshi shisalemsatepdak sabang tajung ka asütsü aser ano state level nunga asenok Aor officers telongjem nüngdaker," ta paisa ashi.

Iba kasa sentong nung Ao Senso Telongjem Dimapur nung tir Wb. Meren Nokpui tepela o ashi aser Kr. Moajungla Jamiri ken tajung ka aten.

Tang nungi iba DZAOT lenitsü

atema ketdangpurtem rongnung tir Wb. Imosong Imsong (Jt. Commissioner, Taxes), Tadong tir Wb. R. Atsüng Tzüdir, Jt. Director, Statistics; Tongti zülur Wb. Lanuzülu Aier, Section Officer, NU-SET; Repsem Zülur Wb. Tekatemsü Imchen, Deputy Director, Agri.; Kimen Wb. I .Anungba Sanglir, Jt. Director, Food & Civil Supplies nungertem den ano Sanen Luden nung züngsem 17 aser Senotsü Luden nung züngsem 5 shimogo.

Item lenirtem asoshi temoatsü aser taochi meshija Indisen Baptist Arogo nung sannüker Rev. Dr. Temjen Ozükümi sarasademtsü.

Iba senden sentong tenzüka Unity Ao Baptist Arogo nung sannüker Rev. Panger Jamiri sarasadem aser tatem sarasadem Dimapur Watsü Telongjem nung mendenbula Wt. Aoinlai agia liasü.

Tanü DZAOT tenzükbä senden sentong nung mendenbuba Wb. I. Anungba Sanglir aser Tezuluba Wb. Lanuzülu Aier na liasü.

India nung tesem aika tatsükba akümstsü

New Delhi, April 8, 2023 (Agencies): Taruba anogo pungu tsüngda India kübok tesem teimbaka tatsükba akümstsü ta India Meteorological Department (IMD)-i Honibarnü metetdaksü.

Tesem aika nung 2 nungi 4 degrees Celsius agi tatsükba akümstsü ta IMD-i ashi.

"Bihar, Jharkhand, Uttar

Pradesh, Odisha, West Bengal, Chhattisgarh, Maharashtra, Gujarat, Punjab aser Haryana nung heatwave anogotem ajurutsü asadangteter" ta IMD Director General Mrutyunjay Mahapatra-i ashi.

1901 nungi tenzüker India nung February ita tatsükta taküm ajurua liasü ta IMD-i ashi. Ajisüaka, akhi ama masü tzünglu talila aruba ajanga

March ita nung kanga tatsükba maküm ta parnokisa ashi.

Tzüngluruwa marudang tzünglu kanga aruba, rü tsükba aser tsüngpret dena yipru aiba ajanga taküm Uttar Pradesh, Haryana, Punjab, Rajasthan, Madhya Pradesh, Maharashtra aser tanga state aika nung t s ü n ü s e n b o n g t s ü t e m raksatsüogo ta IMD-isa metetdaksü.

Advisor, TN Manen-i tenüngsang agütsüba sentong ayongzük



T.N Manen (IAS Rtd)

Mokokchung, 08 April (TYO): 23 Impur Assembly Constituency nungi adoksang Advisor, Law, Justice & Land Revenue Govt. of Nagaland, T.N Manen (IAS Rtd)-i par constituency sanger aser teyaritepertem dang 'temoa' ta ashiba tenüngsang sentong ka Longjang yimdak Community Hall nung ayongzüka kaogo.

TN Manen-i iba sentong nung jembidang, 23 Impur constituency nung küm talangka election nung toktepa aruogo, aji oda, pezübenbuba nung pa mangdang ataloka nüburtemi pa nem yimli agütsüba asoshi pelaba metetdaksü.

Election mapang pei yarinüba candidate yaritsüba demokrasi yimya agi mela-a lir. Aji oda, election mapang ya tamajunga aika ataloker. Saka joko election election tematoker asünung, kati ka tsüngta tsükchitepba ajak amatstila aser

joko koda süir asen constituency aser Asetkong sangertem lungjemer tangar menepa tejakleni aotsü, ta asüba dang tongtibangba lir, ta pai ashi.

Terenlok (development) ji rongsen lenmang aruba ya dang masü, saka terenlokji asenok tsüngta nung teputep aser temeimtep aliba ya-a terenlok maparen ka lir, ta pai ashi. Constituency/Asetkong nung teinyaksü aika lir, anungji, item ajakji lungjemer inyakyonga aotsü, ta paisa shisem.

Yisemyong nung ya ali asadanga (research) agiba ICAR kübok riju (SARS/KVK) lapoka lir, iba ya kanga tongtibang sürnung asenoki mamshiteter. Anungji, itemji tajangzük keta amshitetsü lenmang bushiteptsü, ta paisa shiogo.

Tanü joko govt. mapa angutsü kanga temesü kümatokogo. Govt. sen noklang shilem nung 65-70% sorkar mapa inyaker nem itasen

agütsüdag intoker. Joko sorkar mapa ajak tetoktepa yimya nung dang shima aotsü. Aji oda, lanurtem asoshi sorkar mapa mesiaka tanga mapa inyaksü maongka lenmang bushiteptsü, ta paisa shisem.

Iba sentong nung Longjang council chairman – L. Chuba Jamir-i tarur ajak agizükba o jembiaser Mopungchuket council chairman - Arentemsu, Süngratsü council chairman – M. Teka Longchar, Yimchalu council chairman – C. Wati Walling, Chami council nungi – Purtooshi GB, Longpa council chairman – I. Nungsang Aier, Khanimo council chairman – Tongpang Aier, Kobulong Adhoc Committee Vice Chairman-Imkongshashi aser Yisemyong Adhoc Committee Vice Chairman – Imrongmeren Ozukum parnokio tatsütsü jembiaser.

Ano NDPP central office nungi Vice President - Imtiyanger, Mokokchung District BJP president – Imolemba, NDPP Mokokchung Region nungi Senior Vice President – Lipokzülu, NDPP 23 Impur A/C working president – Temjensangba parnokio shilem agia liasü. Longjang Senso Mungdang President – M. Temjen Jamir-i melepzüng o jembiaser.

Iba sentong nung Limatemsu Aier menden liasü. Nüngtugu Ao ken atener Tiameren Aier-i ken ana tena tesentepertem saksalemdaksü. Kobulong Baptist Arogo Pastor, O Alang den temoatsü meshia sarasademer iba sentong tenzük aser Longjang Baptist Arogo Pastor, Senti Lcr-i tenüngsang agüja arasademertembanga liasü.

NSCN/GPRN-i asükhu lemsatep

Dimapur, Rongchii/April 8 (TYO): April 6 nü asür Huveto Ciero (Kilonser) NSCN/GPRN asüba osang angazüka mang ayimba NSCN/GPRN (Akato Chophi) MIP sangdong ka ajanga metetdaksüogoo.

Porba yimtsüng nungi Veshutso Ciero'er jabaso asür Huveto ya Naga nung tenzüksü atema 1998 küm April 10 nü züngoksema liasü.

Pa o kanga maka aser kanaga anepasa jembibas nisung ka ajisüka Naga nung nujiso atema kanga ajanga ajanga nokdakba nisung ka liasü.

Asür Huveto-i linük yangerba wadang nung mapa balala bena shilem balala agia aruogo. Pa asüba mapang senior Kilonser ka dang masü saka Chakesang Region

mendenbuba liasü.

Pa asüba ajanga takoksa tulu adokogo aser kinungertem mangyim tejashi tia nung aliba mapang Tsüngemi parnok nem iba mangyim jashi koktettsü atema anisüngzük agüjang ta sarasademtsür.

Maneni asür tanüla teti tatem makadak anisüngzükdakjang ta onok sarasadem, ta MIP sangdong ajangsa metetdaksü.

Kohima nung 'World Health Day' mungogo



Dimapur, Rongchii/April 8 (TYO): Indian Red Cross Society Nagaland State Branch den longjemer Indian Red Cross Society Kohima District Branch-i ayongzüka

April 7 nü "Health For All" omen nung ajemdaker 'World Health Day' mungogo.

Society-i, health ya meimchir temeden aser nisung ajak nem mapang shidak aser

tesem tapet nung health care agütsütsü temden aliba indang tangazükba agütsütsü asoshi Kohima jila kübok tesem balala nung poster campaign ayongzüka agia liasü.

Police-i ozüng raksartem anema jenjang tapet agi

Dimapur, Rongchii/April 8 (TYO): April 3 nü SOT Dimapur-i Industrial Village, Dimapur nung alir Makaddas Ali'er jabaso Muhibar Rahmas (31 yrs) puogo. Pa shanflower grams 330 shi soap case 25 nung sepa bener lia pua liasü.

Iba dak sendakba nung West Police Station nung ken o ka benokogo aser maneni bushisüngdangdar.

Kasa mapang nung April 7 nü anepdang 2:45 ako shi nung Burma camp nung Police Point, anasa Mobile Unit 92 duty nung aliba mapang Veterinary Colony len injang akhanba angashia liasü. Iba

sülen team ya injang akhaba tesem lenir aritepa ao aser nisung ana pua liasü.

Police temi apuba nisung ana ya Lhomithi Colony, Dimapur nung alir Hukato Yepthomi'er jabaso Nilotho H. Yepthomi aser Erranipathar, Dimapur nung alir Kughai Aye'er jabaso Toinalo Aye ta jangaogoo.

Police temi tena ket nungi .45 ACP pistol ka aser .45 ACP empty case ka den Ford Eco Sport ka pua East PS ket nung bendanga agütsüogoo. Iba dak sendakba nung East police station nung ken o ka benokogo.



April 08, 2023 anogo nung Dimapur Zone Aor Officers Telongjem tentetba senden sentong Hotel Saramati, Dimapur nung agidang nüngtugu kentener Moajungla Jamiri ken atenba noksa nung angur.

Assam Rifles-i sentong balala ayongzüka agi

Dimapur, Rongchii/April 8 (TYO): HQ IGAR (N) kübok Assam Rifles Battalion-i, World Health Day amungba anogo Jaluki nung April 7 nü school tanurtem aser tesayurtem semdanga liasü.

World Health Organisation-i ayongzüka küm shia April 7 nü World Health Day ya alima ajunga nung nüburtem tenüngdakba apir omen balala nung ajemdaker amunger. 2023 küm atema omen ji "Health for all" liasü, koba health ajungkettsü, alima kümzüka ayutsü aser timtem agi atongtsü aliba nüburtem tenzüksü asoshi lir, ajita asünungdang ajak anema toktsütettsü.

Sentong nung tanurtem nem iba anogo ya, taoba küm 70 tsüngda public health takoktem koba ajanga taküm libaliro jenjang ajungketogoo iba indang lepa reprangshitsü atema maongka tajung ka ta shia iba anogo ayongzüka amungba indang metetdaksü.

Battalion Unit Hospital-i tanurtem aser tesayurtem semdanga mapang merckmejua alitsüba, temang arakzüa inyaksangshitsü koda tongtibang aser health dak sendakba nung tongtibang tangazüksütem indang metetdakja liasü. Sentong nung kaketshir 21 aser tesayur tajung ayongzüka katsüba atema tesayur aser tanurtemi AR dang kanga pelaba lemsatepa liasü.

Kasa mapang nung Assam Rifles-isa, April 7 nü Old Peren village nung "Health for all" omen dak ajemdaker sensaksem sentong ka ayongzüka katsüogoo.

World Health Day ya alima ajunga nung amungba tongtibang sentong ka lir, koba ajanga alima ajunga nung kija aser lokti anema alitsü koda tongtibang iba indang lephsia metetdaksür. Iba dak sendakba nung Assam Rifles-i

World Health Day amungba anogo Old Peren village nung sensaksem sentong ka ayongzüka katsüogoo.

Iba sentong ayongzüka agiba nükjidongji health dak sendakba ken o tem metetdaksütsü, anema alitsü atema libaliro tajung ajungkettsü aser health education agütsütsü asoshi liasü. Sentong nung yimdaklir 47-i shilem agia liasü.

Sensaksem sentong nung yimdaklirtemi health dak sendakba nung ken o balala ashishia kanga yakyaka shilem agiogo. Parnok tebilemstütem ajak takokba tashi bentettsü asoshi AR team-i jenjang agiba den anema alitsü asoshi tasa balala agüja liasü.

Maneni Mon district kübok Chenloisho temeket nung Konyak nung Aoleng benjung April 3 nungi 7 tashi amungba mapang HQ IGAR (North) kübok Assam Rifles-i shilem agia nüburtem den sendaktepogoo.

Assam Rifles sepaitemi lanur, tintet rogo aser tongtibang ketdangsurtem den sensak asem aser benjung temaotsüma nung amungtsü atema imlaja ataba Assam rifles tenüng nung lemsatepa liasü.

Maneni Chenloisho Village Council aser Wangto Student's Union-i ayongzükba Aoleang benjung nung nüburtem den tsüngsang aser kentenba nung Assam Rifles sepaitemi shilem agia liasü.

Kasa mapang nung benjung tenüng nung exhibition football asaya ka ayongzüka asaya, koba nüburtem aika adenshia jangradema reprangogoo. Assam rifles sepaitemi süngkong atema, mi aputetba tetoktepa amala nung shilem agi aser ang ainba, mori chipo atepba aser tsüksenba ken tetoktepa amala tetoktepa repranga liasü.



April 08, 2023 nü Mussoorie (Uttarakhand) nung Indo Tibetan Border Police Academy nung Medical officer tem passing out parade mapang tangokba noksa nung angur.

Jaishankar-i South Korea Foreign Minister den senden amen

New Delhi, April 08 (Agencies): India External affairs minister, S Jaishankar aser South Korea Foreign Minister, Park Jin na senden mena linük ana tsünga tesendaktep tajungba akümtsü atema onük aika nung o lemtepogo.

Foreign minister anati Indo-Pacific region densema onük aika nung o lemtep.

Senden tenzüka okila jembidang Jaishankar-i, "Linük ana tsünga asalentong partnership tajungba akümtsü atema maangka anguba atema ni kanga pelar. Linük ana tsünga tesendaktep yangluba sülen taküm küm 50 ajunger," ta ashi.

"Na mapang tajung ka nung aruogo, kechiyong asen linük ana tsünga shishilembaba jenjang kanga junga lir aser yimtenren tsütsü amalitep jenjang-a junga lir," ta pai ashi.

Park-i, "Asen linük anaprongla ya democracy tsütsü tatitshitsü tajung aliba linük lir, rongsenkettsüng jenjang junga lir aser sobaliba tsütsü tashi tulu aliba linük lir. Linük anapronglai Indo-Pacific region nung tesünep aser azükaru alitsü atema inyaker," ta ashi.

"Iba amaji South Korea aser India na ya partner tajung. Asen linük ana tsünga asalentong partnership ya Indo-Pacific region nungbo partnership tajungtiba asütsü, ta ni bilemer," ta South Korean foreign minister-isa ashi.

Jaishankar majurudang Park-i linük tatong Tir, Jagdeep Dhankhar ajurua liasü.

"Asüng nai Chennai nung Hyundai plant semdangtsü ta ni meteta lir. Anungji asen linük ana tesendaktep atema Hyundai (South Korea nunger company) ya lenmang aika nung temaittsü lir," ta Jaishankar-i ashi.



Jammu, April 08, 2023: Honibarnü Jammu University nung Dogri oshi nung adokba Indian Constitution semzükba sentong nung Union Law Minister, Kiren Rijju nem sempet ka agütsüdang tangokba noksa nung angur.

Punjab sorkari aluyimertem atema Centre dang teyari meshir

New Delhi, Rongchii/April 08 (Agencies): Honibarnü AAP MP, Raghav Chadha-i Union Finance Minister dang Punjab nung tsüngsang-mopung agi alu nung takoksa jenti anguba atema aluyimertem nem teyari agüjang, ta mepishiogo.

Union Finance Minister Nirmala Sitharaman dangi züluba shidi nungji Raja Sabha MP, Chadha-i, taküm March 24 anogo nungi tenzüka state nung zünglu, mopung tesashi aser rür alaba ajanga state nung wheat lu ali hectare lakh 34.9 nungi alu hectare lakh 14 nung tsünüba wheat raksatsüogo, ta metetdakja lir.

"Anojungi mongpu matongdang tzünglu aruba ajanga alu nung wheat tsünüba

aliba raksatsüogo," ta pai metetdaksü.

"Ni Barwa kübok aliba yim ka nung Manjeet Singh, ta ser aluyimer ka ajuru. Pai alu nung raksatsüba tsük-jong ka amer, tenük nung nüktzü tsünger takloksa anguba lemsatepa liasü. Manjeet kinüngtsü shiranger aser lar jala ka züngdaksür," ta pai metetdaksü.

"Alu nung teraksatsüba asadangi arurtem atemabo ibaji records aser statistics dang asütsü. Ajisüaka aluyimertem atemabo ibaji akhümket makai akümba aser tarutsü atema teimla samaba lir. Aluyimertem atemabo parnok taküm alitsü atema takoksa anguba dang masü saka parnok tepela aser tejangraba-a samaba lir," ta pai

Finance Minister nem metetdaksü.

Chadha-i, "Punjab ya asen linük indang auso lir aser aluyimertemji asen rongsenkettsüng tongtoret lir. Asen aluyimertem ajanga aluyimba tsütsü shilem tulu agiogo aser chiyungtsü atema asen linüki tangar dak memetaloki alitsüsa aluyimertemi shilem tulu agiogo. Iba dak alia tsüngsarusa aser alima lendong balala mapang nung chiyungtsü agi manüngtsüsa parnoki security agütsüogo," ta metetdaksü.

"Tang ama Punjab nunger aluyimertemi teyari nungdakba mapang nung Centre sorkari tiyongtsüi aita inyaksüla," ta paisa metetdaksü.

Maharashtra nung lajartem nem sorkar mapa shilem 1 agütsütsü

Mumbai, April 08 (Agencies): Maharashtra state sorkari lajartem nem sorkar mapa shilem 1 agütsütsü aser shisaliok rejutem nunga shilem 1 agütsütsü, ta sangdongogo.

Arrshi küm 18 majungdang tsürabur anaprong süadokba tanurtem nem sorkar mapa shilem 1 agütsütsü, ta state sorkari metetdaksü.

"Lajartem atema shilem 1 ji sorkar mapa tazüng aliba nungi asütsü aser shisaliok rejutem nung menden shilem 1 ji admission menden tazüng aliba nungi asütsü. Lajartemji shilem ana küma lemsar menden

kasasa agütsütsü; shilem kaji nija orphanages mesüra sorkari ketdangtsüba institutions nung alirtem aser kaji pei kinünger kidang alir lajartem asütsü," ta sorkar sangdong ajanga metetdaksü.

State nung coronavirus agi tsürabur anaprong süadokba ajanga lajar akümer 800 shi lir aser lajar ajak senteperbo 4,000 dak tema lir.

2021 küm taoba mapang Chief Minister, Uddhav Thackeray-i aniba Cabinet-i lajartem nem sorkar mapa shilem 1 agütsütsü telemtetba agia liasü.

State nung pei tsürabur,

adianu, kinünger, yim mesüra pei jila memetetba lajartemji category 'A' ta lemsaja lir. Tsürabur anaprong süadoker aliba tanur, caste certificate malirtem aser orphanage nung alirtemji category 'B' aser arrshi küm 18 majungdang tsürabur anaprong süadoker pei kinünger kidang alir lajartemji 'C' category asütsü.

SC nungi kaketshir lajartemji arrshi küm sasep nung tuition aser exam fees atoktsü. 'C' category nung aliba lajartembo shisaliok tsütsü lenla ajak nung tajangzük angutsü saka lajartem nem lezmüksüba sorkar mapa angutsü atemabo temsüa mali.

India nung Covid agi teshirangdakpur 31,194 kümogo

New Delhi, April 08 (Agencies): India nung tesüiba ghonda 24 tsünga nisung 6,155 dak coronavirus putetogo aser ibaji densemabo tang teshirangdakpur 31,194 kümogo, ta Honibarnü Union health ministry-i metetdaksü.

Linük nung coronavirus prok tenzüka sülen tang tashi nung nisung crore 4.47 (4,47,51,259) dak coronavirus putetogo aser tesüiba ghonda 24 tsünga iba tashidak agi shiranger nisung 11 asüba densemabo iba tashidak agi asür ajak agi 5,30,954 jungogo.

Tang linük nung anogo shia coronavirus positive putetba shilem 5.63 kümogo aser hopta shia positive putetba shilemji 3.47 lir.

Linük nung iba tashidak agi shiranger 4,41,89,111 anepogo aser iba tashidak agi asüba shilem 1.19 lir, ta Health Ministry-i metetdaksü.

Tang tashi nung linük nung coronavirus vaccine dose 220.66 agütsüogo.

Tawa India nung anogo shia Covid tashidak teimba-teimba putetdar; March 17 matongdang hopta shia nisung 571 shi dak iba tashidak puteta aruba nungi April 7 tashi nungbo hopta shia nisung 4,188 shi dak iba tashidak

puteta aruogo.

State 8 nung iba tashidak kanga prokdar; Kerala, Maharashtra, Delhi nung district 10 dak tema nungbo anogo shia positive putetba shilem 10 dak tema kümogo; Karnataka, Kerala, Maharashtra, Delhi, Himachal Pradesh, Tamil Nadu aser Haryana nunga anogo shia positive putetba shilemji 5 dak tema kümogo.

Hokolbarnü Health Ministry-i state tem den review senden amenba mapang nung nüburtem nem awareness agütsütsü kanga tongtibang, ta metetdakja liasü.

Union Health minister, Mansukh Mandaviya-i state health minister ajak dang peipei state nung terenemshiba jenjang asadangtsü aser hospital infrastructure ajungkettsüba den külemi nungdakba mozü peria ayutsü metetdaksü.

Kasa senden nungjisa state tem dang mapang shia Covid India Portal nung covid osang update asütsü tuyua liasü.

Taruba Hombar aser Mongolbarnü na nung linük tesem ajaklen sorkar aser nija hospital tem nung 'mock drill' agia terenemshiba jenjang asadangtsü lemetetogo.



Ahmedabad, April 08, 2023: Prime Ministers' Office (PMO) nung ketdangser ka ama sayua nisung aika ashioktsüba ken o nung tai tonglokja alisang, Kiran Patel Srinagar nung apuba sülen Ahmedabad nung aliba Crime Branch office-i anir aruba mapang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, RONGCHII (APRIL) 09, 2023

Toma aser Asenok

Yisu asüba anogo bilemteta amongba anogo nung Yihuda Iskariot tenüing metetshiang Yisu kangki nung asenok menen asoshi angenlokba indang mejembitet ama, Yisu shia aruba anogo bilemteta amongba anogo nunga Mary Magdala, Peter aser Yohan nungertem indang otsü dang nungibo Yisu nütsüing ternana rongnung ka, Toma indang otsüang temetnuba aser tanganüba süa jembir, kechiyong tangar nütsüing dang nungibo Toma jakla yimya aser mulungsentsü yagiang asenok temesükba. Yisu nütsüing ter rongnung Toma asoba otsü ya balaka, kechiyong Laishibai ashir, pa ya jakrep chir liasü. Laishiri ashiba agi, pa tenüing ya ana liasü, Aramaic nung Toma aser Greek nung Didymus, ajisüaka tenüing anaprong tetezü jakrep. Pa ama asenoka tangari ashiba o kisüing nung mamangi asüngdangtepa odi süra, Toma den asoba jakrepji shiba (?) ta temetnüsüka, saka Laishibai aji mashir. Ibaji kodang bilemdangdir, ashiko, tanü tendakbo Toma den külemi asoba jakrepji asenok asütsüa akok. Yisu sür külen, nütsüingtem taküm nung kechi ataloktsü aser kechika inyaka alitsüar memetet tetsübu, terata aser shisabolu agi sünger ki ka nung kishi shibanger alidang Yisu parnok dangi aru aser Pai parnok dang Pa tekabu, Pa tesa aser Pa tetsüing sayu ta Yohan 20 aser Luke 24 nung shia angur. Yisu shia arur Par nütsüingtem nem tanela temeshi tashi ain agüja 'commision' sütsüba mezüingbubaji ya liasü. Ajisüaka, iba mapang nütsüingtem rongnung Toma mali asü. Laishibai pa maliba indang dang ashir ashi, pa ya kong liasüar mashir. Ajisüaka, Pa o nung angatetba agi, pai Yisu ya sür shia arutsü ta kenyongi mamang, anungji Yisu sülen küm ishika anidakbato amajok kümogo ta bilema pa kisüing tesem ka nung tetsübu aser tezüdang nung tapu tapu bilema kazür südi. Atangji, pai dang masü saka tangar tanüingba nütsüingtemia Yisu sülen anidak tashibo teti takok aser tebok sünga dang alitsü ta bilemer südi. Ajisüaka, tang yabo tamakok dang masü saka maksü tulu nung parnok kibuba Yisu Khrista Rom aser Yihuda nungertemi tepseter Pa mang dena parnok ket nung lir. Nütsüing ter sentepa alidak Yisu adokba indang Tomai kenyongi mamangba indang shingaia Yisu dang mashi saka Yisui metet, anungji ano nütsüingtem sentepa alidak Yisu tanaben adokdangbo asen den Jakrepba Toma dena liasü. Idangji, Yisui mangmangsang Toma (Doubting Thomas) dang, nai mangmanger süra Pa tekabu aser Pa tesa zübo nung pa temeyong asenokang ta ashiba angur. Ibai Yisu shia aruba dak mamanger ka nem agütsüba taochi tuluka liasü. Atangji, Tomai Yisu tekabu aser tesa nung mekongshi saka ngur amang. Iba taochi jagi Toma kümzük. Ajisüaka, Toma tamangji tamang masü, kechiyong shitakba tamangjibo mangu ser amangba lir. Ibayongji, kasa tamanger rongnunga shirnoki mangu ser amangogo, parnokjibo ngur amangertem dang nungi tajungba aser temoatsüba ta Yisui ashiba angur. Atangji, reprangdangra Toma ya tasümaier aser Yisu sülen manidaknuba nisung ka masü, kechiyong Yohan 11:16 nung Yisui Lazar asüba osang angashia Bethany leni odi ta ashidang, yangji oagi Yisu den külemi Yuhuda nunger nem parnok ajak onsetsütsü tashi mulungtetbaji Toma liasü. Atangji, Toma ama par medemertem rongnunga Yisu arudang kar danga mali asüka asübo parnokia Yisu shia aruba dakji amangla asü mamanglar memetet, ashiko parnokia Toma amaji mamangla akok. Asenoki aiben Tomai Yisu dak mamangbaji aija bilemer aser jembir, ajisüaka asenokibo tanüa Toma amaji Yisu shia aruba dakji mamanger. Lepteptsüingtepa aliba lendong aser mangsa aliba timtem nungi Yisui dang asenok kümzük, saka asenoki mangmanger. Ashi, asenoki amang asübo asenoki ochi külemla. Toma dak tajunga aika liasü. Pa ya amangli amangerbo züingzunga amangtsü ta asüba nisung ka liasü. Iba jagiang, Yisui nütsüingtem dang parnok ajak külemi alitsü talidak renemi aotsü aser ilen jagi Pa sülen parnoka arutsü ta ashidang, " Kibuba, na koloni aotsü onoki memetet, ajangla kodaser onoki lenmangji metettsü ?" ta Tomai-ang asüngdangba ka Yohan 14 nung shia angur. Iba ama tekümtet jungjunga jangjar külenang, Tomai Yisu shia aruba dak tamang dang amang masü saka India tonga aruagi taküm ajak bendanga agüja kuli süa jajaba kuli aika lir. Atangji, Yisu temeim aser Pai inyakba sayatenya dak kisüing amangbaji masü saka Pa shia aruba dakji amangtsü nungdaker, kechiyong Yisu shia maru asübo Yisu asüba anogo aser mapang nung to Yisu otsü ya tar nunger otsü amaiang ka kümer lila. Tomai Yisu dak mamangtetba asoshi Pai pa marütsü saka pa lenchii oa taochi sayu, kasaji tanüa Pai asenok mamangtetba purtem dang temeim aser taochi sayur. Yisu shia aruba nungji asenok tamang tuluba küma amangtsüsa tashi aser taochi lir.


OLEMSABANG

"OAGI TENEM KOLAK NUNG KANGKI ASEM"

~ Tiala Imchen, Dimapur.

Yisu Khrista dak amanger ajak dangi tamasa "Happy Easter" salem abener. Kangki timtem majangi shia aruba ain aser Sentsüwangshi mali. Aji oda shia aruba indang jembidang Good Friday onük kar süoka mejembira otsü tabensa masur ta angateta asen kolok aser mulungsentsü ken Kangki dangi meyipdi.

Küm Meyi ana tema ago, oagi talang nung Golgota tenem kolak ret nung maksü Kangki nungji nisung asem meta liasü. Teyongtsü nung aliba kangkijibo tai maket aji Yisu



Khrista. Telok jagi iba tetsübuttsü tatalokbaji jangratema repranga, ano zükang, merenshiang, ta shia atala, menüja, metsü metsülokja anidak. Iba telok nungji nisung ishikati (nütsüingtem & tetsürtem) temulung shiranga, tsübuseta miima anidak.

Golgota tenem kolak ret nungji nisung asem asü, saka na aser ni asoshi asübabo ka dang liasü. Temeim amangbapurtem, naia ne tenükji khen amour bilemdangang. Calvary lenmangji kanga talang (14 station tashi lir) atur. Anü tatsük jagi tejak nung yaloktsür. Kojal aketba lisü agi Yisu dak arepdang, shilong zükteter, asentzü aser azü agi tejak yimpanger lenmang mangu jajadang asemben tashi alangdaktsü.

Alima nung bushidanger mongintemi Yisu rishikangshidang amshiba oset kar asadangba reprangdi: 1. Ai-Yisu tokolak nung semtsüba Ai (thorn) korangji 1+2 inch liasü 2. Kangki- Yisui abenba Kangki (Cross) 110 pounds approximately 50kg taret 3. Via Dolorosa-Yisu Kangki apur jajaba Calvary lenmangji 5280ft. talang (He walked with Cross) 4. Kojal - Yisu teka nung angenba kojat tasazükji 3/8 inch long square shaft (1 cm) across. Pa tetsüing nung angenba kojat jibo 5/9 inch across long square shaft. 5. Pa tangu sashitsü mokoki liasü (He extremely hard to breath) 6. Azü jenti tokshi (A huge loss of blood).

Yisu asen menen yong koda rishikangshia calvary lenmang piyong kangki taret apur jajadaktsü aser Kangki nung taküm dang meta-a südaktsü. Alimaji anokshitsü tenzük. Kecha tai maket Yisu nisung tamajunger ana den kesa jenjang nung maksüdakja Kangki nung meta südaktsüba tatalokbaji alimai amatsü makok.


Kangki nung tashi lir. Khristan aieni aoba otsü nung Pa to kodang Yisu Kangki tsüing atong, Pa rongdong nung khu taret bena aliba ajak longzüka ao aser Pa dangi tashi tasen ka aru, aser teyimla tasen nung Pa pungba pungba-a jajaba aseni otsü nung züingogo. Ibaji tangar otsü ka masü, saka asen akümlir wadang, tanela tongpang (Spiritual Warfare) nung anogoshi jajaba indang lir. Pa rongdong nung temenen khu taret abenba amaji asen dak yimya sübaba temenen mokok achi, tenükmeren, telemsa, asükümba, ano aika dang lir. Item jagi asen taküm aser kibong neneteter mejajateti aliba taretji Yisu kangki tsüingdang tokzüka meyutsu tashi, asenok Easter amungba tajangzük maka, Menen khu abener Yisui anisüingzük agütsüdi arung ta ajar. Asenok Pa bushia odi.

Kangki timtem ajanger asen Kibuba Yisu Khrista shia arugo Haliluya. Pa shia aruba ajanga asenok nem teyimla tasen ka bener arutsüogo. Alima nung Leper tazüingji Yisu Leper dak alaka kongga mangutsü. Leper ajak teret agi sünga lir. Tsüingremi iba ocet azünger ajak moajangma.

"The Victorious day is Easter Sunday when Jesus conquered the whole world over Sin, Haliluya"

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'The End Times: A look at the impact of AI' ta ser kaket ka saya



April 08, 2023 nü Tourist Lodge, Dimapur nung Commissioner & Secretary, Health & Family Welfare, Y Kikheto Sema-i "The End Times: A look at the impact of Artificial Intelligence" kaket sayatsü dang tangokba noksa nung angur. Iba kaket ya Awoto Awomi-i zülu.

Dimapur, Rongchii/April 08 (TYO): Honibarnü Tourist Lodge, Dimapur nung Commissioner & Secretary, Health & Family Welfare, Y Kikheto Sema-i "The End Times: A look at the impact of Artificial Intelligence" ta ser kaket ka sayatsüo; iba kaket ya Awoto Awomi-i zülu.

ajanga pa ajungmesoba pai lemsatepa liasü. Kasa sentong nung jembidang Kikheto-i, "Artificial intelligence (AI) ajanga alima nung temelenshi adokdaksü tenzükogo, iba denji külemi loktiliba, rongsenketzung aser yimsüsüba tsütsü tebilemtsü kadaktsür," ta ashi. Paisa, tanü asenoki asen meketa reprangdangra asenoki anasatiba akümer ta

shisadangteter, ta ashi. "AI ajanga tajangzük agütsür, saka iba ya mashileni amshiba ajanga takoksa ajurutsü. Iba ya ajanga taküm nung lenla aika kongshitsü, anungji iba ama technology ajanga akokba tashi tajangzük ang teimba angutsü atema renema alitsüla," ta pai ashi. Paisa, Khristan ka ama asenoki AI tim agi amshitsü atema renema alitsüla, ta ashi.

April 12 nü Mumbai nung Khristantemi longkak aittsü

Mumbai, April 08 (Agencies): Maharashtra nung Khristan organization balalai tentetba 'Samast Christi Samaj'-i Maharashtra nung Khristantem anema inyakba kanga bulua akümba anema April 12 nü Mumbai nung longkak aittsü. Osangbenertem den jembidang Samast Christi Samaj nung otongdar, Dolphy D'Souza-i, "Joko ojangji ojang; Khristantem anema inyakba ya anentsüla aser nisung ajak temeden kümzüka ayutsüla," ta ashi. "Paisa, onok (Khristantem) ya yimjung meimertem lir, ajisüaka yimjak nung onoki longkak aittsüsa kümogo. April 12 nü onoki longkak aittsü. Tang mezüng denomination balala nungi Khristantem longjemtsü," ta metetdaksü. Nikongdang 1:00 ako nung

Byculla Zoo, Mumbai nungi tenzüka Khristantemi longkak aita jajaba sülen tatamsa Azad Maidan nung sentong ka agia tembangtsü. Advocate Jesani-i, asen linük ya secular linük ka, anungji yimjung proktsü nungdak, ta ashi. Advocate Lara Jesani-i, "Supreme Court-i iba sorkar ya tashimait ta shiogo, kechiyong parnoki Sakal Hindu Samaj ama right wing organization balala anema meinyakteter. Tanü tensa ya kanga tongtambang, kechiyong yimsü telok balala tsüngda rara adoker. Ajisüaka asen linük ya secular linük ka anungji yimjung proktsü nungdak," ta ashi. Meimchir temden atema inyaker, Ram Puniyani-i, "Tesüiba küm ishika tsüngda tesempa politics kanga bulua kümogo. Golwalkar-i, Muslim

nunger, Khristantem aser Communist tem ya linük atema amokmeren ta jembiba asenoki meteta lir. Ajisüaka asen linük ya Hindu linük masü. Asen linüki temzung kübok inyaktsüla. Tamangba yimsü meyipdaksüba atema Khristantem nem tai tongloktsür, ajisüaka 2011 census nung Khristan nütsüngji shilem 2.30 dang lir," ta ashi. Khristantemisa ozüng alema raksatsüba Tenla kitem tanaben yanglutsü atema takhangba agütsütsü, ta Samast Christi Samaj teloki metetdaksü. Samasta Christi Samaj-i denomination balala nungi Khristantem longjemter ola adoktsü nükjidong nung inyaker. Parnokisa Maharashtra state sorkar dang state nung minorities ajak nem kasa temeden agütsütsü atema takhangba agütsütsü.



April 07, 2023 nü UK kübok Gloucester jila nung Good Friday amongdang Yisu Kangki nung metaba jilushi aiba mapang tangokba noksa nung angur. Gloucester nung nisung noklang aika adenshia 'The Way of the Cross' jilushiji repranga liasü. Iba jilushi moapu nung sayaba dak sendakba nung Holy Trinity Church nungi Rev. Rachel Forrest-i, "Good Friday nü atalokbaji Tenla ki telung nung atalokba masü saka nisung ajaki angutsüsa yimti yimdong nung atalok," ta ashi. Iba jilushi ya Gloucester Cathedral, Gloucester City Deanery aser Gloucester nung aliba Arogotemi longjemter ayongzüka liasü.

ANO GO ABEN TSÜNGREM DEN

TENZÜKBA AJANGA TUSHIBA

"Tepela agi Kibuba tenzükang, Pa tsüngdangi ken tena arung" (T.Ken 100:2)

Tepela ola jagi tepelaba tenzükba mapa dangi anir. Asenoki Kibuba pelaseta tenzükdi süra, asenok o temji mapa kümdaktsütsüla, Yisu anemsü agi külemertem dang tekümdangtsü ashi (Matt. 15:8). Asenoki Kibuba koda chichiba nung külemtet?

Mezüngbuba asenoki mulungsoa tenzüksüla. Tsüngremi mulungba inyaktsü asoshi asenok alangzük. Iba tekong ya tejen lai nung Yihuda nunger asoshi tongtambang, kechiaser parnoki alar indangji meteta liasü. Tsüngremi pa tenzükdaksütsü asoshi parnok Ejipt nungi anitet.

Tanabuba, mejameja tenzüksüla. Asenoki Tsüngrem aser tangar ka külemi tenzüksü makok (Matt: 6:24, Anitet 20:2-3). Saka Yisu asoshi asenoki tangar tenzüksü akok. Aseno alizüngji Pa dang peladaktsütsüba lir.

Tasembuba, asenoki pelashishia tenzüksü akok. Khen khen asenok tamatokba chir o entepba tambusang ama jaklar; asenoki Tebui mulungba aser mapa inyaktsü akok, saka asen mulungjang Pa mulungjang nungi talangka piladaktsür. Memulungi inyakba mapa Tsüngremi maginür. Iba jagi raksatsür. Kodang asenok pelashishia tenzükter, asenok aginür, renloker aser ajungmesodaktsür. Kibuba tenzükba nung na pela lir ma?

SARASADEM:

Tsüngrem na pelashishia tenzüksü ajungshidakjangma. Amen.

Israel nung Khristantemi akhidang aliba yim ka nung Easter among

Iqrit (Israel), April 08 (Agencies): Lebanon den 1951 küm Supreme Court-i, arrtsülen Israel nung tamalen raksatsüba yim ka nung Khristantemi Easter among; pei yimtsüng raksatsür aliyonga akhidang nungi Easter monga aruba sobaliba meraksai parnoki iba yimdam Easter sentong agi. Lebanon nung telungpurtem aser Israel sepaitem arrtsülenji khatepa liasü, anungji Khristantemi iba yimdamki sentong magitetsüa akok, ta bilema liasü. Iba sentong nungji putir, Souhail Khoury-i Iqrit yimdamki oa iba sentong agiba ya asenok atema kanga tongtambang, ta ashi. Yimdam leper nung ayongzüka sentong nung jembidang putiri, "Good Friday nü asen yimdam kibongtem aser tanur ajak yagi arua yangi rema aliba tsüraburtem aser kinüngertem semdanga sarasademer," ta ashi. Khoury-i, "Iqrit yimdam alirtemi kenü anogobo iba yimdam ano nisung alitsü aser pei limai tanaben meyipa arutsü teimla nung asenoki akhidang nungi benshia aruba ama iba yimdam Easter amonger," ta ashi. Iqrit yimdam ki ajak raksatsüo aser tangbo yimdam leper den Tenla ki dang lir. 1948 küm Israel linük tentetba sülen rara tulu adokba mapang nung sepaitemi iba

yimdam alirtem meindoka liasü. 1951 küm Supreme Court-i, iba yimdam alirtemji pei yimdamki tanaben aotsü atema melatsüla, ta obendang agüja liasü saka kasa küm nungjisa Christmas atongtsü anogo ka dang lia yimdam ki ajak bendokja liasü. Putirisa, "Asenok yimdamki arua lir, saka asenok ya asen linük nung refugees kümogo," ta ashi. Khoury leniba nungsa Khristantemi leper nungji sarasadem agi. Khristantemi iba yimdam jagi tanaben oa alitsüa atema court dang teyari meshidar. Parnoki sodi mapang, kiyimba sentong agitsü aser tasü mang aremtsü atema iba yimdam jagi aoer. 1948 küm 'Nakba' mapang nung yim noklang aika raksaja liasü aser Palestine nunger 760,000 dak temai pei ki toktsür aotsüsa aküm. Palestine nunger shisashir, Walid Khalidi-i iba mapang nungji yim 400 shi raksatsüo, ta ashir saka Israeli organisation Zochrot-ibo yim 600 dak tema raksatsü ta ashir. Iqrit yimdam Khristantem adenshia Easter amongba mapang nung Yirusalem nunga Khristantemi Yisu Khrista Kangki lenmang bilemteta Yirusalem yimti tejenba tashi jaja shilem agi.

**AO OSHI ANGAZÜKDAK:
TANÜ ANGAZÜKTSÜBA OJANG**



Pokpo

(n) aonung chiyima senzüba ozü, tenük tulu (owl)

* **Pokpoi** koya aser per bushia achir.

Pokra

(v) ulua aküm (swell)

* Chi tululu chiyongba agi **pokra** akümer.

OLONG PAITEP # 6481

	1			2			3		4
5							6		
7			8						
							9		
		10							
11									12
					13				
					14				
15									

TIPIEN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tönung ka - (6)
- 4. Ali telungi talangka lur - (5)
- 5. Tebang kenyongi mazuoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6480 TELANGZÜBA

TIPIEN :

- 1. Teti, 5. Wamesa, 6. Salem,
- 7. Yasüng, 10. Sala, 11. Küme,
- 12. Bangji, 15. Ainer, 16. Lemtsü,
- 17. Aong.

LANGTSÜNGLEN :

- 2. Tali, 3. Tesü, 4. Sangremer,
- 6. Shisabulu, 7. Yimti, 8. Saku,
- 9. Jang, 13. Nema, 14. Ango.

KHEN SHISADANGDI

YES BOSS GOVERNMENT :

USA President : Hellooo.... Ni Naga nunger Lilir Mr. Alokba den khen jeminur.

Lilir Alokba : Hello...Ni Mr. Alokba langzür...Na shibai kong nungi jembir ???

USA President : Ni America President-i Washington D.C. nungi jembir...Tang ner lima Government aniba "Rulling Party" tenüngji shiangjo ...???

Lilir Alokba : Ena Sir...Ozü oshi agi "Ajak ka akümba Party"... Saka English oshi agibo "All is One" Party agü-ja.

USA President : O K....Sürabangla ano "State Government" tenüng-jia kechi...???

Lilir Alokba : Ozü oshi agi "Hau...Hau...Hai...Hai" Government... Saka English oshi agibo "Yes Boss" Government....agü-ja.

USA President : Waaaooo...!!! Sürabang Party 'Manifesto' -ji kechi agütsü ...???

Lilir Alokba : Sir... Iba-jibo English oshi agidang shidi.... "Money-Festo" agü-ja.

USA President : Waaaooooa...!!!!!! "Wonderfull"

"Oh My God".

- L.Kika Pongener.

NE kaketshir 10,000 tema NEGC-2023 nung shilem agir



Khanapara, April 8, 2023

(Agencies): Honibarnü University of Science and Technology Meghalaya (USTM) nung 7 buba North East Graduate Congress (NEGC)-2023 tenzükogo.

Northeast state 8 nungi college balala kaketshir 10,000 tema USTM nung adenshia lir aser parnoki sports, cultural, literary & start-up competitions den competitive examinations, personality development sessions aser job fair nung shilem agitsü.

Kasa sentong nung USTM ajanga North East Principal & Faculty Meet-2023 ayongzüker aser iba nung college 200 tema adener.

"Northeast nung lanurtem ajangzükdahtsütsü atema NEGC ayongzüker. Iba ajanga parnoki alizüng ayur aser linük yangerba nung shilem agitsü tebilemtsü abener" ta USTM Chancellor Mahbubul Hoque-i

ashi. Iba sentong lapokdang USTM Vice-Chancellor Pro GD Sharma-i tesentepertem pelaa agizük aser USTM Pro Vice-Chancellor Dr Balendra Kumar Das-i anküp tepela o jembir.

Sentong nung tetushi süa jaokerji Public Health Engineering, Assam Minister Jayanta Malla Baruah liasü.

NEGC-2023 lapokba sentong nung youth icons, academia, politicians, cultural & sports icons, o jembirtem, college principal tem, tesayurtem aser kaketshirtem aden.

Taküm tetoktepbba rongnung tongtipang anaji 'Best Performing College-2023' aser 'Best Magazine Award-2023' lir.

Tetoktepbba balala atema takoker nem Rs 50 lakh tashi senpet agütsütsü renema lir. NE Principal & Faculty

Meet nung Minister Jayanta Malla Baruah-i principal kar nem Academic Leadership Award-2023 agütsü aser motivational speaker Thomas John Rose-i 'Leadership in Academics' onük jembia liasü. 7 buba North East Graduate Congress (NEGC)-2023 nung co-curricular activities aika ayongzüka agir.

Sobaliba tetoktepbba nung cultural showcasing, skit, group song, group dance, on-the-spot painting, mehendi, cartooning, photography aser rongoli shilemtem lir.

Ano, saisapong nung volleyball, kabaddi, chess, arm wrestling, powerlifting, badminton, basketball & horse riding tetoktepbbatem lir.

Maneni, literary tetoktepbba nung debate & quiz lir aser "Globalization has posed a threat to the economy" onük nung o atsüteptsü.

Assam Rifles & Manipur Police-i PLA telungpur ka apu

Imphal, April 8, 2023

(Agencies): Manipur kübok Imphal East District nung People Liberation Army (RPF/PLA) telungpur ka apu.

Assam Rifles aser Manipur police commandos külem telok kati Khewa Phuju Leikai nung mita aodang RPF/PLA authority ajanga agütsüba identity card aser PLA foundation day programme chart ka angu.

Iba nisung ya Army No 337

Rank Captain Lanbilung Kamei (Restafen) ta jangjaogo aser pa ya Neikalong Thangmeiband nungi lir.

Osang ka angazükba sülen 4 Assam Rifles aser Imphal East nungi Special Police commandos ajanga Khewa Phuju Leikai Imphal East District nung mita ao.

Iba maparen ya Headquarters Inspector General of Assam Rifles (South) lenisüba kübok

Hokolbarnü inyak ta Defence sangdong ka nung metetdahtsü.

Parnoki mobile check post ka mendanga atadang RPF/PLA Captain Lanbilung Kamei apu. Idangji pa dang asüngdangya asüadang paia maitüsü jangjatsü ta sangdong nungsa shia lir.

Captain Lanbilung Kamei aser pa ket nung apuba ajak Sagolmang Police Station ket nung agütsüogo.

West Bengal nung Mizoram nunger 2 ket nung hon apu



Guwahati, April 8, 2023

(Agencies): April 8, 2023 nü West Bengal kübok Jalpaiguri district nung nisung ana ket nung Rs 8.61 crore alang gold bars bena aliba apu.

Osang tejangja ka

angazükba sülen Panikauri toll plaza nung Directorate of Revenue Intelligence (DRI) ketdangsurtemi gari ka mita repringdang hon bena aliba angu.

Iba gari ya Assam nungi

Kolkata-i aoerba liasü aser gold bars 113 bena liasü.

March 31, 2023 nü Assam Rifles sepaitemisa Manipur nung aliba Khudengthabi Permanent Vehicle Check Post nung gold biscuits aika apu.

Assam Rifles indang Tegnoupal Battalion sepaitemi two-wheeler ka mita repringdang gold biscuits 10 bena aliba angu.

Iba nisung ya Moreh nungi Imphal-i aoerba liasü aser pa indang tsüngsem nung gold biscuits miima bena liasü.

Pa ket nung bena aliba gold biscuits indang jenjangji Rs. 1.01 crore liasü aser grams 1,660 liasü.

China-i Taiwan temeket nung military drill agi tenzükogo



Taiwan-i azüoka aliba Matsu asetkong anasa Fujian Province kübok Fuzhou anasa military drill ayongzüka agiba mapang China nung warship ka nung sepaitem nokdaker süiba noksa nung angur.

Beijing, Rongchii/April 8 (Agencies): China's People's Liberation Army (PLA)-i Honibarnü Taiwan meketbangsü atema warships aser fighter jets tem yokogo.

Taiwan tir Tsai Ing-wen-i iba hopta US nung anezüka House speaker, Kevin McCarthy den ajurutepeba atema telangzüba agüja military tashi sayutsü atema iba drill ayongzüka agidar.

Asetkong temeket nung Honibarnü China nung indang warships ti aser fighter jets 42 inyaksangshiba jangjaogo, ta Taiwanese defence ministry-i ashiba agi, jet 29-i Taiwan indang southwestern air defence identification zone (ADIZ) süiaogo, koba taküm anogo ka nung Taiwan süia China nung indang Tayimtsü senzüba timtiba asütsü.

Chinese PLA's eastern theatre command (ETC)-i, Joint Sword" exercises kübok "combat alert patrols" sentong ka tenzükogo. Iba exercise ya Taiwan Strait nung ayongzüka agidar, koba ajanga China aser Taiwan ya lemdangtsür. China nung sepaitemi north, south aser east len nungi Taiwan meketbanger iba sentong ayongzüka agidar.

Taiwan temeketi PLA-i long-range rocket, artillery, destroyers, frigates, missile boats, fighters, bombers, electronic warfare aircraft, aerial tankers aser - conventional missiles tem yokogo.

April 8 nungi 10 tashi anogo asem agitsü aliba drill ya 2022

küm August ita sülen PLA military exercise tulutiba asütsü imlar. Taoba küm US House Speaker Nancy Pelosi-i Taipei semdangba sülen China-i iba asetkong longbanger missile tem tendanga military exercise sentong tulu ka ayongzüka agia liasü.

"Taiwan Strait kübok asetkong anütok tip, anülulentip aser anütoklen tzü aser anung nung patrol aser exercises ayongzüka agidar," ta ETC otongdar Shi Yi-i sangdong ka ajanga metetdaksüba state media-i sangdonga liasü.

Tawain nüjiso atema nokdakba aser parnok bendanger tashi den longjemer inyaksangshiba atema iba tekümdangtsü metetdaksür ta shia Shi-i, national sovereignty aser territorial integrity kümzüka ayutsü atema iba exercise ya ayongzüka agitsü kanga tongtibang lir, ta ashi.

Tsai-i Central American linük, Belize aser Guatemala semdangba den US nung anezüka US nung diplomates aser yimden yimsüsürtem den ajuruteper Taiwan-i meyipa aruba sülen anogo ka lir iba exercise ya Honibar anepdang tenzüka liasü.

China-i Taiwan ya parnok kübok tesem ka ta züngshir aser iba asetkong aser tanga linük ka tsüngda official sensaksemba magizüker aser iba amala inyakyim ya linük telung ken o nung jushiba ka ama züngshir.

"Patrols aser drills yagi kinük pezüsü nungi Taiwan asetkong meketbangogo aser iba ajanga asetkong nokdanga ayuba den

pa balaka küm daksüogo aser bendanger tashi kechaia iba asetkongi meitetsü aser Taiwan armed forces tema asetkong toktsür motetsü," ta Chinese mainland military expert aser TV commentator Song Zhongping-i state meyong Global Times dang ashi.

China anütoklen Fujian province indang Maritime Safety Administration-i, Hokolbarnü tekümdangtsü ka metetdaksüogo aser ashiba agi, Honibar, Mongolbar aser Brehostibar ta April 15, April 17 aser April 20 nü Pingtan nungi km 90 shi pilar Fuzhou tzüküm nung injang akhatsü, ta Global Times-isa metetdaksü.

PLA navy-i iba hopta tetenzüklen Taiwan anütoklen tzükümü Shandong Carrier Strike Group (CSG) yokogo. Iba rong ya tang mezüngbuba training nung shilem agir aser Bodhbarnü Bashi channel ajanga süiogo.

Taiwan indang Mainland Affairs Council-i China dang azüzüka inyaksangshitsü ayongzüko.

Communist Party of China-i military tashi amshia Taiwan maneni amokmerener aser iba ajanga asetkong temeket nung aliba tesemtem aser Taiwan Strait nung yimjung raksatsür, ta council-i ashiba den sorkari national sovereignty aser democratic nüjiso atema maneni nokdaker.

"Taiwan-i kodanga haihaora makatsü aser onoki merongshitsü mesüra mebilemdangi inyaksangshi masütsü," ta council-isa ashi.

ANGO METSÜ AGINERTEM ASOSHI OSANG KA

Howrah product fish seed: -

(a) IMC – Catla, Rohu, Mriga

(b) Exotic Carp – Grass carp, Silver carp, Com.carp

All mixed 1000 nos of fingerling with oxygen packing @ Rs. 700/- per packing, April last week nung angutsü. Advance sen deposit asütsü akok. Agüja aliba contact No. nung metetpelatsü metetdaksür.

K. Meren Lkr - 8837251425

Opp. Fire Brigade Office, Sungkomen Ward, Mkg.

N Korea-i ano underwater nuclear attack 'drone' ka tendangogo



April 8 nü North Korea indang official Korean Central News Agency (KCNA)-i lemsatepeba noksa nung linük anütok tzükümlen underwater strategic weapon ka tzüyim telungi yokba sayuogo.

Pyongyang, Rongchii/April 8 (Agencies): North Korea-i ano nuclear-capable underwater attack drone ka tendangogo, ta state media sangdong ka ajanga metetdaksü.

Haeil-1 ta nungja agütsür underwater drone system tasen ka tendangba osang metetdaksüba sülen hopta ka lir ano Haeil-2 ta nungja agütsür tzü telung nung amshiba drone ka tendangogo. Haeil-1 tetezü ya Korea oshi nung "tsunami" lir aser tzü telung nung tzükchirtem meima amaktsü atema lir.

Iba tzü telung nung amshiba drone ya amshi tenzüksü atema renema ali mali aji Analyst temibo temulung melemi bilemer, ajisüaka North Korea-i prnok indang hadirtem United States aser South Korea na dang sayuner, shrnoki hopta ishika tsüngda military exercises sentong tululu ayongzüka agia arudar.

Tatemsabuba tetendangba ya April 4 nungi 7 tashi nung agia liasü, ta state media KCNA-i Honibarnü metetdaksü.

"Underwater nuclear attack drone Haeil-2 tzü telung nung km 1000 shi yim oa liasü," ta agency-i ashiba den, iba warhead ya tapoka pokdakja liasü, ta ashi.

"Tetendangba ajanga iba tzü telung nung amshiba hadir dak temulung lemtetsü aser tashi tulu aliba kuli tejangja ngutetogo," ta osang ajanga metetdaksü.

North Korea-i otsüsüsüsa 2022 küm missile aika tendangogo aser taküma

maneni tendanga arudar. US aser South Korea nati military exercise ayongzüka agiba ajanga parnok defence ajungkettsüsa kümogo ta parnoki ashir. Item exercise tem ya parnok amaktsü atema renemshiba ka lir ta N Korea-i shia arudar.

March 23, North Korea-i ashiba agi, tzü telung nung amsiba nuclear attack drone yagi "radioactive tsunami" ka adokdaksütetsü. Iba mapang state media-i, iba drone ya tzü telung nung ghonda 59 sen minute 12 senzüba sülen pokdakja liasü, ta metetdaksü.

Satellite noksa ajanga North Korea indang nuclear complex tongtiba nung inyakyim tali akümba sayuogo. Kim Jong Un-i weapons-grade nuclear material yanglutsü atema tetuyuba agütsüba sülen iba tesem nung inyakyim tali kümogo.

Taoba küm North Korea-i parnok ya "irreversible" nuclear power ka ta sangdongogo aser Kim-i North Korean military dang rara asoshi renemshitsü atema tetuyuba agüja liasü.

2019 küm Kim aser iba mapang US tir Donald Trump na tanabuba senden amenba sülen Denuclearisation sensaksem bangdaka lir.

United Nations bangzüng balala kübok Pyongyang nem ballistic missiles tendangtsü atema tenokdangba agütsür lir aser parnok indang weapons programme dak sendakba nung tenokdangba balala agütsüsüsa langa lir.



Italy nung tanur asoba 2022 küm otsüsüsüsa 400,000 tekübok kümogo, ta national statistics bureau ISTAT-i Hokolbarnü metetdaksü. Italy nung tanur kanga ajema asoba ya national emergency ka ama züngshir aser taoba küm election nung Georgia Meloni-i iba teblemtsü bentetsü atema police tepet benoka inyaksangshitsü tenangzüka agüja liasü.

Kompany-i aniba Burnley team Premier League-i iogo



Vincent Kompany

London, Rongchii/April 8 (Agencies): Burnley coach Vincent Kompany-i ashiba agi, par team kanga kara Premier League-i promote asütsüsa asayartetba ajanga pa dena süngmanger. Hokolbarnü goal 2-1 agi Middlesbrough akokba sülen parnok taruba season PL nung asayatsü atema jenjang ajangzük tetogo.

League nung asaya 19 tashi khen danga tamakok mongui asayaba sülen parnok tasembuba jenjang nung aliba Luton team dang nungi point 19 agi timba kümogo.

Burnley pur ano asaya tenet asayatsü anunga lir anungji parnok ya Championship era nung takaratiba promote asüba team kümogo.

"Asaya tenet asayatsü

anunga lir aser onok benjungtep tenzükogo. Onoki iba ya mimla," ta Kompany-i Sky Sports dang ashi.

Anderlecht nung mezüngbuba caoch mapa inyakba tembangba sülen taoba Manchester City captain takaratiba nung anisemba ya club asoshi kanga tajangzük tulu liasü.

Burnley pur English top flight nung season trok asayar taoba küm relegate asüba sülen aikati kanga tsüba bilema liasü.

2020 küm tatemlen American consortium kati club alizükba sülen parnok relegate asüba mapang nung loan pound million 65 aliba timba agütsüshitsüsa aküm.

Iba sülen pound million 70

alang asayartemi club toktsür ao aser Kompany-i sen ishika dang intoka team tasen ka yanglushitsüsa aküm. Pai Belgium nung inyakyim jangja aliba aser City den tesendaktep aliba ajanga inyakyim takok ngua bener oteta liasü.

"Iba ya imla aliba ama masü aser onok sentonga maliasü," ta Burnley mendenbuba Alan Pace-i ashi.

"Vincent küna iba indang jembiogo aser onok sentongji küm ana mesüra asem tsünga ataloktsü ta jembia liasü. Team kanga tajung aser Vincent-i hopta shia ashiba nenoki angashitsü," ta paisa ashi.

Hokolbarnü asaya nung Ashley Barnes-i Burnley atema mezüngbuba goal idaktsü ajisüaka Middlesbrough atema Chuba Akpom-i goal ka idakja goal kasasa aküm. Chuba atema iba goal ya tang asaya aliba season nung goal 27buba liasü.

Ajisüaka asaya atemtsü minute 24 anunga lia Full-back Connor Roberts-i Burnley atema tanabuba goal idakja parnok asaya koka liasü.

Burnley-i iba asaya akokba ajanga Sheffield United pur Premier League-i ia asayatsü asoshi jenjang tajungba kümdaktsüogo, kechiyong Middlesbrough pur pezübuba nungang lir.

Sheffield pur tang tanabuba jenjang nung lir.

Kinayala Aier-i Poomsae category nung bronze medal angu

Dimapur, Rongchii/April 8 (TYO): Kota, Rajasthan nung tawa tembangba 5buba National Cadet Kyorugi & Poomsae Taekwondo championship nung Poomsae category nung Nagaland nungi arishi küm 12 tain Kinayala Aier-i bronze medal nguogo. La ya Nagaland nungi iba category nung medal anguba mezüngbuba asayar kümogo.

Hokolbarnü lai iba takok tajung anguba atema Dimapur District Taekwondo Association, DDTA-i la nem tetushi agütsüba sentong ka ayongzüka katsüogo.

Sentong nung DDTA, general secretary T M Chowdhury-i Christian Higher Secondary School, Dimapur nung azünger Kinayala Aier-i, Nagaland nungi tetsürtem rongnungi national championshipka nung Poomsae category nung mezüngbuba medal ngua state nem konang tetushi bener arutsüba atema tenüngsang agüja liasü.

Paisa, iba takok ajanga state nungi lanur asayartem la tsüngsü nung anidaka tarutsü nung medal timba nguyonga



Kinayala Aier

aotsü asoshi ajungmesotsü amangba lemsatapa liasü.

Maneni pai lenla balala nung saisapong inyakyim ajungkettsü atema teyari agütsüba atema Nagaland Taekwondo Association dang kanga pelaba lemsatapa liasü.

Ajak senteper iba asayamung nung tetsür ana densema Nagaland nungi asayar 8-i shilem agi aser team-i bronze medal pezü ngua liasü.

Delhi Capitals-i Guwahati nung academy ka lapokogo

Guwahati, Rongchii/April 8 (Agencies): Linük ajanga nung grassroots level nungi cricket asaya ajungkettsü atema inyakyim benoka aliba nung shilem ka ama IPL franchise Delhi Capitals puri Guwahati nung DC Cricket Academy lapokogo, koba northeast nung parnok indang academy mezüngbuba asütsü.

Iba dak sendakba nung Guwahati nung amenoker aliba ICON Sports Academy den longjemba indang DC-i Hokolbar anepdang sangdonga liasü.

Academy lapokba sentong nung DC indang director of cricket Sourav Ganguly, head coach Ricky Ponting, assistant coaches Pravin Amre, Shane Watson aser DC cricket academies tekolakba Jagrit Anand nung den ICON Group of Institutes secretary Debashish Bora, Assam Cricket Association (ACA) joint secretary Rajinder Singh, vice-president Rajdeep Ojha, Meghalaya Cricket Association tir Naba Bhattarjee aser DC ICON Academies head coach Syed Zuffri Zakaria nungeri

shilem agia liasü.

Iba academy ya yimti nung indoor training area ka aliba cricket facility lir, kong accommodation facilities-a agütsür aser lanur cricket asayartem atema turf aika agütsür. Academy nung BCCI Level 2 coach tem teyari agia Northeast nung aliba lanurtem professional küma asayatsü asoshi maongka tulu agütsütsü.

"Guwahati nung Delhi Capitals Cricket Academy ajanga tetsür aser tebur chanu aika nem gear tajung semer pitch tajung nung training agitsü atema maongka agütsütsü. Delhi Capitals-i teyari agütsüba ajanga northeast nungi India team nung asayatsüsa asayartem adoktsü ta ni amanger," ta Ganguly-i ashi.

Training centre nung facility tem indang jembiba mapang head coach Zakaria-i, "Guwahati kübok ICON School premises ka nung ultra-modern indoor cricket facility ka amenoka lir. Training facility nung outdoor Astroturf wickets pezü den kaketshirtem fielding practice asütsü asoshi ground tila ka lir," ta ashi.

AFC Asian Cup Draw atema India Pot 4buba nung ata lir

Rongchii/April 8, 2023 (Agencies): AFC Asian Cup Qatar 2023 Final Draw atema India pot 4buba nung ata lir, koba May 11 nü Doha, Qatar nung asütsü. FIFA World Ranking sangdongba sülen tang iba osang ya jangjatsüogo.

Katara Opera House nung draw masü tsünga taoba asayamung ama Qatar Pot 1 nung mezüngbuba jenjang nung ata lir, ajita asünung dang 2024 küm January 12 nü asayamung tenzükba anogo asayamung ayongzüka asayaba team ya asayartettsü.

Pot 1 nung asayamung ayongzüka asayaba linük den tawa sayaba FIFA Ranking nung Asia linüktem rongnung tanabuba nungi trokbuba tashi nung aliba team tem densema lir. Temaba jenjang nung aliba linüktem ya Japan, Islamic Republic of Iran, Korea Republic, 2015 champions Australia aser Saudi Arabia lir.

Pot 2 nung 2007 champions Iraq, 2019 hosts United Arab Emirates, Oman, 2011 semi-finalist Uzbekistan, China PR



10 nü final asayaba sülen takoker jangjatsü.

Asian Football Confederation (AFC)-i Bodhbarnü sangdong ka ajanga, AFC Asian Cup ya January 12 nungi February 10, 2024 tashi asayatsü ta metetdaksüogo.

Asia nung temaba jenjang nung aliba linük 24 iba asayamung takok marok atema tokteptsü. Taoba mapang dang nungi tali fan tem shilem agidaktsütsü nükjiong yur inyaksangshiba nung shilem ka ama iba asayamung 18buba nungbo mezüngbuba asaya Hokolbarnü tenzüktsü aser final asaya hopta tatemli asayatsü.

AFC-isa iba asayamung ya Qatar kübok Al Janoub Stadium, Al Bayt Stadium, Ahmed Bin Ali Stadium, Al Thumama Stadium, Education City Stadium, Khalifa International Stadium aser Jassim bin Hamad Stadium aser Abdullah bin Khalifa Stadium nung asayatsü ta metetdaksüogo. Stadium ti rongnung trok nungbo FIFA World Cup Qatar 2022 asayaogo.

aser Jordan densema lir.

Kasa mapang nung Bahrain, Syria, Palestine, Vietnam, Kyrgyz Republic aser Lebanon pot 3buba nung lir aser India, debutants Tajikistan, Thailand, Malaysia, Hong Kong aser Indonesia pot 4buba nung lir.

2019 küm United Arab Emirates nung asayaba ama team 24 ya telok trok küma lemsatsü aser telok shia team pezüzü asütsü. Asayamung nung telok ajak nungi temaba jenjang nung tembangba team anana aser tasembuba jenjang nung tembangba team tajungtiba pezü round of 16-i aitsü aser 2024 küm February

BILEMDANGANG

"Molungsua agütsüba nung temoatsü lir."